

四庫全書

史部

欽定四庫全書

世宗憲皇帝上諭內閣卷一百二十五

雍正十年十一月

上諭四道

初五日奉

上諭聞得天津駐防兵丁之父母兄弟從前派往時存留京師數年以來陸續赴天津就養於子弟者甚多此項兵丁原因京師難得官差伊等子弟衆多而糧餉無幾

未免度日維艱是以於天津地方設立水師營或係孤身或有情願離其父兄之人令其披甲前往駐防所給糧餉原止量其二三丁口養贍之資伊等父兄子弟從前派往時並未披甲同去後欲與其子弟相聚任意到彼伊等有限糧餉安足養贍將此交與阿魯查明如係原派駐防時即披甲同伊等子弟前往駐防者令其照常居住如係派往駐防後自京師前去者俱著撥回著交八旗都統等嗣後如有無故退差欲往天津就伊子

弟者斷不可令其前去如有在京實無養贍必應令其前去者俟奏明再行遣往

十四日奉

上諭朕看滿洲武舉武進士等於綠旗營不甚相宜若與綠旗官員一體擢用倘此內有人平常者不但於營務無益亦且壅滯伊等陞遷之路嗣後將滿洲武舉武進士如何補用及如何陞轉之處著兵部會同八旗都統等詳悉定議具奏

又吏部議奏各部院筆帖式缺出向有借缺還缺之例多滋弊端請將考取翻譯人員不論旗分按等次補用奉

上諭借缺還缺易滋弊端誠如部議惟是筆帖式員缺乃該旗人員出身之路若本旗一時無應補之人即將別旗人員頂補恐行之日久漸至人少亦於情理未協嗣後該旗筆帖式缺出除將裁缺扣缺另補病痊告降之人補用外若再不得應補之人不必即將別旗人員頂

補暫將員缺存留積至十缺內外時將別旗應補之人帶領二十員引見候朕閱看人材降旨補授

二十二日戶部帶領揀選倉差學習人員引

見奉

上諭倉場係糧儲緊要之地朕年來悉心整頓漸次清理若監督不得其人必致仍復廢弛關係非小此所派學習人員即係將來接任監督務須勤慎潔清實心辦理方於倉務有益如不能勝任舊監督即據實申詳該堂

官秉公察核另行揀補儻舊舊監督徇情容隱將來學習人員接任之後如有弊端一經查出將舊監督一體處分此後各衙門保送筆帖式時著該堂官將才堪辦事身家殷實者揀選保送若二者不可得兼著該堂官自行奏聞

世宗憲皇帝上諭內閣卷一百二十五

欽定四庫全書

世宗憲皇帝上諭內閣卷一百二十六

雍正十年十二月

上諭二道

十五日奉

上諭據署陝西巡撫史貽直奏稱武功縣生員李倬同州生員劉運惇承家孝謹七傳皆合族而居懇請旌揚以光盛典等語李倬劉運惇同居七世敦睦可風朕親書

扁額頒賜以示嘉獎其建坊題碑之處仍著照例行

二十四日管理正紅旗漢軍都統事務和碩莊親王
允祿叅奏該旗太原府知府劉崇元涇陽縣縣丞羅
思哈將子姪私留任所奉

上諭旗員子弟久隨外任不但伊等安逸遊蕩荒廢無成
而在署干預地方之事每壞伊等父兄聲名是以從前
議定外官子弟十八歲以上者悉令歸旗或讀書肄業
或披甲食糧使之各有成就不至廢棄此朕教養之恩

也至伊等子弟中有可以助其父兄辦理事務或另有情節不能相離者朕原准其奏聞請旨而道府以下官員不能自達於朕亦有督撫代奏之例今太原府知府劉崇元將伊姪劉度昭私留任所不令來京涇陽縣縣丞羅思哈將伊子什勒誑稱年歲未及不行咨送似此怠玩功令之員不可不加懲戒劉崇元羅思哈俱著解任送伊子姪來京該旗大臣奏聞請旨著將此旨通行曉諭八旗嗣後倘有不行奏聞而私留子姪在任所者

一經叅奏悉照劉崇元等之例解任親送子弟來京仍
交部照例議處

世宗憲皇帝上諭內閣卷一百二十六

欽定四庫全書

世宗憲皇帝上諭內閣卷一百二十七

雍正十一年正月

上諭十道

初五日奉

上諭川省為產米之鄉歷來聽商賈販運從長江而下以濟鄰省之用雍正九年巡撫憲德以川省米價稍昂又復碾辦軍糈奏請暫禁商販赴楚此不過一時權宜之

計及至雍正十年川省收成豐稔米價平減憲德即當
奏請開禁乃至今仍復照前禁遏以致米穀不能流通
楚省不得川米之益是憲德但知有己而不知有人甚
非大臣公平辦事之道况目今江浙有需米之州縣望
濟於楚省而該撫不令川米赴楚則鄰省何所資藉著
即傳諭憲德速弛米禁毋蹈遏糴之戒

又奉

上諭朕前以各省民人內必有人材壯健技勇可觀願為

國家効力以圖上進者是以特降諭旨令各省督撫召募揀選送京訓練以備軍旅之用伊等如果能奮勇出力建績立功將來俱可為干城之寄故疊加恩賚於應募後即各給守糧一分以贍養其家口進京時各該督撫給與路費口糧到京後令王大臣等料理撥給房屋居住月餉銀米俱從優給發且特賚恩榮賞以內府物件起程赴陝又各賞整裝銀兩一切路費俱令寬裕支領暫令駐劄近邊地方以候差用俾伊等得展効力之

心並各圖進身之路是朕加恩於勇健兵者至為優渥
伊等身受朕恩應各自揣量實為過分惟有慎守法度
奮勉向前將來論功行賞伊等功名正未可量乃各省
召募之人其中固多果敢有勇可收實用者亦有放縱
驕悍生事不法者上年到京即不安本分肆行爭鬪及
令赴陝沿途又復生事騷擾該督撫曾具摺參奏而駐
劄甘州之後竟有私行脫逃之人陳天培又具奏前來
此等無賴棍徒固由各省督撫不慎重揀選濫募充數

總統大員不能嚴行約束整飭教導之所致而在伊等受恩而不知感自甘廢棄冥頑惡劣即令調赴大營亦不可用著總兵周一德即行甄別挑汰遞回本籍交該地方官嚴加收管不令出境生事其途閒行走及回籍之後若有心懷怨望捏造浮言并恃強肆橫鬪毆不法等事該地方官立即拘拏稟知督撫提鎮一面奏聞一面將該犯即行正法至於挑存勇健可用之人俱能遵循法紀必知感激朕恩嗣後當益加勵努力戎行以

圖上進朕必加以恩澤著將此旨曉諭勇健營兵丁等
咸使知悉

初八日奉

上諭上年江南沿海被水地方如常熟等二十二州縣並
續報之華亭等六縣該督撫等已遵旨撫綏軫恤定議
大賑三次每次以一月為期料寒冬初春以來窮民存
養有資不致失所矣朕念二三月間正青黃不接之時
尚須籌畫接濟資其力作庶可無誤春耕著再加賑四

十日以昭格外之恩其有從前遺漏貧民並先可餬口而目下力不能支者亦著查明添入補賑之內再被水之鹽場竈戶亦照貧民例加賑一月該督撫鹽政等務須督率有司實力奉行使被水之家均沾恩澤以副朕恤災拯困之至意

又奉

上諭江南范公堤為沿海之藩籬鹽場之保障原係商人捐修工程聞現在殘缺甚多急應修築堅固現據署兩

江總督魏廷珍委員確勘料估著即一面具題一面乘
二三月間作速興工使沿海窮民得以傭工餬口但工
程綿遠需大員董理著交與協理河務西柱即行督率
料估悉心查辦

十三日奉

上諭各省學校之外地方大吏每有設立書院聚集生徒
講誦肄業者朕臨御以來時時以教育人材為念但稔
聞書院之設實有裨益者少浮慕虛名者多是以未嘗

敕令各省通行蓋欲徐徐有待而後頒降諭旨也近見
各省大吏漸知崇尚實政不事沽名邀譽之為而讀書
應舉之人亦頗能屏去浮囂奔競之習則建立書院擇
一省文行兼優之士讀書其中使之朝夕講誦整躬勵
行有所成就俾遠近士子觀感奮發亦興賢育才之一
道也督撫駐劄之所為省會之地著該督撫商酌舉行
各賜帑金一千兩將來士子羣聚讀書須預為籌畫資
其膏火以垂永久其不足者在于存公銀內支用封疆

大臣等並有化導士子之職各宜殫心奉行黜浮崇實以廣國家菁莪棫樸之化則書院之設于士習文風有裨益而無流弊乃朕之所厚望也

十四日理藩院奏烏朱穆秦扎薩克和碩車臣親王色登敦多卜恭進軍需馬匹奉

上諭扎薩克蒙古王台吉內生業殷實之人情願幫進軍需應用羊馬者甚多俱著照從前進馬給價之例賞賜銀兩將所進馬匹牲畜分入各旗派買牲畜數內收管

嗣後遇有情願幫進者著即送往各該盟主處令所派
買馬之扎薩克等驗收報部照定價賞賜至於伊等効
力之心朕自洞悉不必特行遣人宣諭

十六日奉

上諭大定協副將楊馥統兵擊賊奮勇先登為暗鎗所傷
其忠義之氣甚屬可嘉聞伊子楊恒新現在軍前技勇
頗優亦甚有志氣著授為遊擊不必在軍前効力遇有
遊擊缺出即行題補平越營遊擊羅資袞以率兵應援

勇往被害深可憫惻伊子羅雲標現在隨征効力著授
為守備該督等酌量題補至楊馥羅資袞應得卹典俟
事竣題報到日仍照例賞給

二十日奉

上諭甘涼肅兵丁本年應支糧料草束例應折給銀兩自
行採買朕因甘省年來辦理軍需食物昂貴兵丁所領
折色銀兩恐不敷採買之用特令加倍增給以示格外
之恩提鎮大員自應體朕軫恤兵丁至意悉心料理加

意愛養近聞弁員中尚有營私瞻徇凡於過往應酬及一切雜費俱於各兵攤派即如甘提馬厰每年尚有餘利若盡歸公用於兵丁不無小補前任提督宋可進祇知網利不恤兵艱且尅扣餉銀濫用公帑各鎮將弁未必不倣效而行著署督劉於義侍郎杭奕祿嚴飭陝甘提鎮將營中所有除各官俸薪及親丁名糧外凡有餘利俱歸公用以接濟兵丁不得絲毫乾沒入己亦不得借公費等項名色攤派兵丁以致苦累一切閒費俱槩

行禁止庶於兵丁實有裨益署提督劉世明受恩深重
尤當實力奉行毋得仍蹈故轍自取罪戾如嗣後弁員
有私派侵蝕等弊該署督等即行叅奏並將該管提鎮
一併叅處

二十四日奉

上諭國家以制科取士原以覘士子所學而士子所學關
乎世道人心是文體之所係固重也士子讀聖賢書果
能講求明體達用之學則以平日蘊蓄發為文章自然

法正理純得聖賢語氣可以傳世而行遠作後學之津
梁此則有本之學有用之文為國家所重賴者若不於
根抵講求而但以華靡相尚則累牘連篇皆屬浮詞聖
賢精義既全無發明聖賢語氣又毫不相肖國家亦安
用此浮誇淺薄之士哉至於二三場策論尤足覘經濟
實學乃向來士子多不留心而衡文者又每以經義已
經入彀遂將策論濫收恕取不復加意閱看殊非設科
本意今會試伊邇著禮部先期曉諭應試士子於二三

場文藝均應努力殫心毋得潦草完卷試官如以限於
時日不能細心校閱後場不妨奏請展限務得真材以
收實用若所取試卷中有經義可觀而策論疵謬荒踈
者朕惟於主考官是問

三十日奉

上諭朕躬謁

陵寢見沿途地方安設水缸甚多或係動支錢糧或係派用
民力著查明具奏地方官職司民牧當以利濟閭閻休

養百姓為務今觀伊等情形祇以灑道清塵為迎合朕
心之舉錯謬已甚鑿輿所過即畧有塵土亦復何礙伊
等於此等處過於用心轉被朕之譴責何不以此心用
之於民生吏治重受朕之嘉獎耶將此一併傳諭知之

世宗憲皇帝上諭內閣卷一百二十七

欽定四庫全書

世宗憲皇帝上諭內閣卷一百二十八

雍正十一年二月

上諭七道

初六日奉

上諭江南濱海州縣上年遭值水患貧民乏食朕已大沛
恩膏蠲租散賑加意撫綏今春又頒諭旨加賑四十日
資其耕作務令得所近聞有司奉行不力吏胥作姦竟

有未霑實惠之窮民現在嗷嗷待哺而松江所屬尤甚此雖罪在有司而督撫等豈無見聞咎實難辭著該督撫嚴行申飭竭力稽查並督率郡縣官速為料理儻再有怠忽從事者定將大小官員嚴加處分

初八日奉

上諭古云兵可百年不用不可一日不備所謂備者非徒操練技勇演習行陣而已如馬匹軍裝礮火器械軍行必需之物一一皆預備於平時及有事調撥便可刻期

啓行不至拮据延緩此乃設兵之本意也我國家承平
日久武備漸覺廢弛年來朕屢降諭旨諄諄訓飭雖該
管大臣等稍知以訓練為務然馬力不足資裝器具不
周每聞派遣之信往往勉強周章遷延時日所謂預備
者但有虛名而無實際此則該管大臣所當深知痛改
加意整理者又如營中有必需之匠役不得不酌量給
與兵糧數名以資養贍而將弁等每多借此名目將水
火夫役等人多佔名糧又每將精壯名丁多派為親隨

不令當差及遇頭目把總缺出即於此內拔補以致荷
戈持戟者差使繁多而不得上進之路朕向知此弊已
屢加申飭近聞此風仍未全改亦著該管大臣嚴行查
察毋得姑容又聞各營中間有公中餘利如甘州提標
馬廠之類原係存公備用者而該管將弁往往據為己
有收入私橐遇有過往應酬及營中雜費則攤派於兵
丁名下而不恤其艱苦此弊尤當禁革今再行曉諭儻
敢視為具文仍蹈前轍勿謂罰不加衆希冀苟免其情

罪輕者必照例處分若有情罪重者必在本地正法示衆

十六日奉

上諭武職官員凡於當差之處理應佩刀朕前為此特降諭旨敕令一體遵行今聞雖侍衛等俱不親身佩刀令僕役執持隨行及進紫禁城始取而自佩出即解授僕役此皆由該管大臣不謹記朕旨不查管屬員之所致也如果將朕訓旨繕寫實貼不時看閱何至遺忘著交

與領侍衛內大臣都統等嚴飭各該管侍衛官員等於
應佩刀行走之處務令佩刀嗣後如仍有不自佩刀者
一經查出朕惟該管大臣等是問

二十日奉

上諭據巡察山西御史周紹龍奏稱現在大同旗兵有七
八人於去年十二月內恃強毆打鐵匠尚宏謨將尚宏
謨兄弟送知府處審訊又本年正月內鑲藍旗護軍鐵
頭向老民楊祿買烟爭角以刀背打傷楊祿面皮流血

曾經總兵官衙門提審等語伊等俱係滿洲兵丁世受國恩自出兵之後並未効力行走輒敢任意違禁在地方生事甚屬可惡著行文哈達哈等將此等妄行兵丁務必查出同地方官審明懲治其為首二人革退護軍即於彼處永遠枷號示衆伊等起程時所得恩賞等項著該旗催追繳還俟大兵凱旋時再將伊等釋放

二十二日奉

上諭從來天時之旱澇由於政治之闕失人事著於下天

道應於上感召之機捷於影響朕深明此理纖毫不爽而刑獄為民生休戚所關更為緊要一有枉抑天氣即為之不舒此更顯然者上年京師無雪今春雨澤又少朕心惶懼深恐用人行政之間錯誤失當朝夕修省莫釋於懷朕觀各部院事務如吏部戶部工部俱覺整飭禮部事簡兵部雖未能整理然尚不至於大誤惟有刑部聲名不好司員作弊胥吏逞姦道路之間人言嘖嘖海壽身為尚書乃一部之表率伊先懷挾私心何能使

所屬之人奉公守法乎况司官中之不肖鑽營者往往
濫膺保舉闔部官員何由心服而抒誠供職諸務自然
廢弛百弊因之叢集讞獄之不得其平者必多宜乎

上蒼垂象以示儆也王國棟受朕深恩膺封疆之重寄伊在
湖南浙江等任非水即旱或遇蟲災歷歷可數及回刑
部辦事而天時又有亢旱之象伊心尚不知儆畏視為
泛常是漢軍汚下習氣全然未改也刑部職任何等重
大而海壽王國棟之居心行事若此一任司官胥吏作

姦犯科舞文弄法豈有不上干

天和之理朕屢次諄切誠諭深望伊等愧悔悛改倘仍然執迷不悟想伊二人非教訓之所能感化朕惟有執國法以正其罪非第革職降罰而已刑部事務朕非不欲另派大臣清查經理然新派之大臣平時既未練習科條一到豈能洞悉情弊展轉思維不得不仍於經歷之大臣是問著即將大小事件應完結者完結應改正者改正種種弊端徹底釐剔務期正本清源毋再因循玩忽

海壽王國棟二人尤須洗滌肺腸痛改前非力圖後效
庶幾挽回

天意否則身試法網亦無可如何也朕前躬謁

陵寢見沿途地方安設水缸甚多比時詢問按察使竇啓瑛
據奏係動支錢糧預備者因即降旨切責云地方官職
司民牧當以利濟閭閻休養百姓為務乃祇以灑道清
塵為迎合朕心之舉錯謬已極鑿輿所過即畧有塵土
亦復何礙爾等於此等處過於用心冀朕歡悅轉被朕

之譴責何不以此心用之於民生吏治重受朕之嘉獎
耶比將竇啓瑛交部議處今觀畿輔之地雨雪亦未均
調竇啓瑛為職掌刑名之大員而識見庸陋如此則聽
斷讞鞫之際必有不得其當者安得不加儆懼爾等部
院大臣俱有辦事之責刑部固為刑名總匯而各部事
務與刑名相關涉者亦多如戶部錢糧之虧欠工部工
程之查核吏部兵部員弁之考成皆有處分及交送刑
部之件諸大臣俱應慎重周詳小心敬謹以凜

天戒朕之用人行政如有錯誤諸大臣科道等即當切實指陳直言無隱朕省身思過實出至誠若少有從事虛文之意是自欺以欺

天矣尚敢冀

上天之感格乎文武大臣科道等官向有輪班條奏之例近年以來軍務殷繁暫時停止今恐耳目或有未周下情或有壅於上達者著仍照前例輪班條奏

二十四日辦理軍機大臣奉

上諭據爾等議將歸降之厄魯特烏魯木等四人充補護軍安插京城居住等語此內那爾畢克來歸時伊兄二人俱在途間被殺烏魯木來歸時伊之一子被殺一子自盡情殊可憫著將此二人發往察哈爾地方安插居住照其應得房地之分酌量加恩添賞牲畜其被獲之厄魯特噶爾兆哈什哈猛克不必發遣江寧著暫留京另行安插

二十五日

諭內閣駐劄西藏官兵原為護守湯古忒等以防準噶爾
侵犯而設近日賊人在厄爾德尼召地方大敗步行逃
回其勢已窮難於遠奔藏地則將來無力進兵可知且
貝勒頗羅鼐協力防守而湯古忒兵丁亦較前奮勇整
齊現今藏內無事若兵丁多集則米穀錢糧一切費用
等項雖非湯古忒等所出而由內地運往伊等不免勞
苦朕意量留數百兵丁防守藏地其餘俱行撤回不但
湯古忒等不致勞苦即官兵亦得甦息其留藏兵丁著

總兵官周其鳳帶領同總理藏內事務之青保馬拉苗
壽居住其在藏兵丁應撤回若干及駐劄乂木多地方
雲南兵丁或應照舊留住如何得使兵民兩便之處爾
等詳議具奏

世宗憲皇帝上諭內閣卷一百二十八

欽定四庫全書

世宗憲皇帝上諭內閣卷一百二十九

雍正十一年三月

上諭六道

初四日奉

上諭聞福建各官養廉及公用之項該省所出稍有不敷查浙江公用養廉二項朕將正項錢糧撥給十萬兩充用該省每年皆有餘剩從今年為始著將浙省銀撥二

萬兩解送閩省以補養廉公用之不足可令該部即行文該省督撫等知之

初五日奉

上諭雲南貴州廣東廣西四川福建六省舉人赴京會試路程遙遠非近省可比朕意欲於落卷中擇其文尚可觀而人材可用者添取數人候旨錄用以昭朕格外加恩之意著傳諭主考官於六省試卷遵旨取中外其次等可取之卷不拘數目秉公選出俟發榜後朕另派大

臣會同主考官驗看人材再加遴選奏聞請旨再六省
落第舉子內除願於下科會試者不必報名外若有情
願小就以圖即行錄用者著在禮部報名一併交與派
出之大臣主考官揀選奏聞請旨該部預行出示曉諭
六省舉子知之

初十日廣東總督鄂彌達奏題補武弁譚行義等請
給咨送部引

見奉

上諭該督遞行題補各員俟譚行義引見之日一并降旨
廣東離京路遠非近省可比嗣後雲貴兩廣福建四川
等省叅將以上人員除未經引見外若有引見已過三
年應令赴京者該督撫先行請旨不必即令起程

十四日奉

上諭自古聖賢立教性理乃其本源學問經濟如一轍也
必有明理見道之儒始有致遠經方之用在家則為端
人正士在國則為良吏名臣風化所以日隆人材所由

日盛也逮後世儒術不醇真偽雜出聰慧者專務吏材
文藻以為功名進身之階而迂拙之人文材俱無可觀
而又不肯自安於庸陋於是竊道學之虛名妄希稱譽
甚且私立異議交結黨援有玷儒修深為國蠹致令當
世厭聞道學之名此皆由伊等務名而不求其實之過
也向年

聖祖仁皇帝考試詞臣曾以理學真偽命題作論蓋深知其
弊而指示訓誨冀人勉為真理學以為經濟之本也朕

御極以來敦崇儒行首以正人心端風俗為務比年來
士習民風亦頗知奉法循理惟是學士大夫中究心理
學之書以收明體達用之效者尚寥寥無人今年會試
之期天下舉子四千七百餘人雲集京師朕特命通曉
性理書之詞臣問以性理之學而應召者僅有數人且
亦不過涉獵文辭未能深窺義蘊則士子平日之不留
心理學可知矣朱子曾有言曰佛家之教却是要自理
會所以他那下常有人自家這下自無人今世儒者能

守經者理會講解而已看史傳者計較利害而已何人
從自家身已做去不理會自身已說甚別人長短明道
曰已立後自能了當得天下萬物只是從程先生後不
再傳而已衰所以某常說自家這下無人朱子之言如
此朕觀古人之論理學必貴乎實心理會實力施行今
世之人竟置理學於不講尚望其專心理會舉而措之
事為間哉常見世之貌為理學者於聖賢體用之學全
未研究祇因不能高出於衆但服敝垢衣啖粗糲食排

詆釋道之教自命理學以為欺世盜名之計及問以吾
儒性理義蘊又茫然一無所知理學之真偽即此可見
若以詆謗釋道即為理學如回教西洋教皆理學矣理
學何如是之易為哉夫佛仙之教以修身見性勸善去
惡捨貪除欲忍辱和光為本若果能融會貫通實為理
學之助彼世之不知仙佛設教之意而復不知理學之
本源但強以闢佛老為理學者皆未見顏色之論也朕
願天下之以儒為業者各求其分之所當盡遜志黽勉

以求無忝於先儒用是特頒此旨通行訓諭若讀書服
官之人果能潛心正學誦法聖賢實踐躬行澄源端本
下為鄉閭之矜式上為朝廷之羽儀則先儒有薪傳正
派之遺徽國家收文章事業之實用朕心嘉悅必加禮
重其共相勉勵以副朕之企望著該部行文內外各直
省咸使聞知

十七日

諭內閣朕統御中外一視同仁凡番族人等有遵奉法紀

抒誠効力者無不厚加恩澤如四川口外之疊爾格土
司等奉公趨事上年已頒諭旨從優賞賚其打箭爐之
明正裏塘巴塘乍了察木多類五齊洛隆宗說板多冰
壩等土司土婦喇嘛營官及頭目人等歸誠內附十數
年來謹守住牧奉法急公而內地兵丁赴藏駐防經行
該地番民等遮運糧石供應承辦其腳價等項雖悉行
按數給發不使擾累而伊等効力奔走於一切差使並
無遲誤勤勞恭順甚屬可嘉應厚加恩賞以示獎勵又

聞土民中有生計艱難者亦應加恩賞恤俾得並沐恩施共享樂利其如何分別賞賚之處爾等詳查酌議具奏

二十五日奉

上諭喀爾喀車臣汗垂扎卜具奏懇請俸祿從前未給喀爾喀汗等俸祿者蓋欲伊等各守舊業不令同衆扎薩克王等一例將屬下人等另編旗分佐領也今車臣汗垂扎卜既行懇請著給與親王之俸每年加賞銀二千

五百兩其土謝圖汗扎薩克圖汗亦著行文詢問若不願請俸仍守舊業各聽其便若情願請俸著照車臣汗垂扎卜之例賞給

世宗憲皇帝上諭內閣卷一百二十九

欽定四庫全書

世宗憲皇帝上諭內閣卷一百三十

雍正十一年四月

上諭十五道

初一日大學士尹秦等將殿試策十卷進呈

上親覽酌定名次啓彌封至第三名張若靄奉

上諭此大學士張廷玉子也策內議論確有識見想其習
觀習聞稟承家訓得大臣忠君愛國之意是以敷陳之

言切當懇摯如此張廷玉佐朕多年居心行事比諸古人臯夔稷契信可無愧且自伊父張英累世厚德繩繩相繼宜其後人克肖賢才蔚起以副國家之用朕於爾大臣等深願人人如此乃慊於懷耳

又奉

上諭今日諸臣進殿試卷朕閱至第五本字畫端楷策內公忠體國一條云僚采之際善則相勸過則相規無詐無虞必誠必信則同官一體也內外亦一體也文武亦

一體也廣而至於百司庶職何莫非臂指手足之相關也此則純臣之居心可以不負千載一時之遭逢而贊襄太和之上理數語極為懇摯頗得古大臣之風因拔置一甲三名諸臣皆稱為允當及拆號乃大學士張廷玉之子張若靄朕心深為嘉悅蓋大臣子弟能知忠君愛國之心異日必能為國家抒誠宣力大學士張英立朝數十年清忠和厚終始不渝張廷玉朝夕在朕左右勤勞翊贊時時以堯舜期朕朕亦以臯夔期之張若靄

稟承家教兼之世德所鍾故能若此非獨家瑞亦國之慶也因遣人往諭張廷玉使知朕實出至公非以大臣之子而有意甄拔乃張廷玉再三懇辭以為普天下人材衆多三年大比莫不想望鼎甲臣蒙恩現居政府而子張若靄登一甲三名占寒士之先於心實有不安倘蒙皇恩名列二甲已為榮幸之極朕以伊家忠藎積德有此佳子弟中一鼎甲亦人所共服何必遜讓張廷玉跪奏云皇上至公諸臣亦無私曲以臣子一日之長蒙

恩拔取但臣家何等恩榮未備只算臣情願讓與天下寒士求皇上憐臣愚衷若君恩祖德佑庇臣子留其福分以為將來上進之階更為美事陳奏之時情詞懇至朕不得不勉從其請著將張若靄改為二甲一名即以二甲一名之沈文鎬改為一甲三名以表大臣謙謹之誠併昭國家制科盛事朕之私中公與張廷玉中公中私之心迹亦令普天下士子共知之

又內大臣海望等覆奏浙江海塘工程事宜奉

上諭朕思尖塌兩山之間建立石壩以堵水勢似類挑水壩之意所見固是若再於中小疊開挖引河一道分江流入海以減水勢似更有益從前雖經開挖旋復壅塞者皆因惜費省工之故今若倍加工力開挖兩工並舉更覺妥備石壩建後即有漲沙而石塘亦可漸次改建以為永久之利其開挖引河之處著浙江總督程元章會同命往大臣汪澂張坦麟等相度地勢酌量辦理

初二日奉

上諭前據顧琮等奏請准順天天津等七府五州酌量領運北倉米石以備平糶並將所存倉穀存七糶三以濟民食朕已允行今思目下正當青黃不接之時糧價漸昂各處皆有常平倉穀其存貯米穀一萬石以外者准其存七糶三一萬石以內者准於糶三之外酌量加增存貯甚少者或添運北倉漕米或撥領鄰近倉儲務令各處米價得平小民易於糶買再者直隸冬春雨雪稀少目今農事方殷民皆盡力於南畝恐新舊錢糧一時

難以並徵著將雍正九年以前帶徵銀兩緩至秋收完納該督等遵諭即行辦理

初八日奉

上諭國家聲教覃敷人文蔚起加恩科目樂育羣才彬彬乎盛矣朕惟博學鴻詞之科所以待卓越淹通之士俾之黼黻皇猷潤色鴻業膺著作之任備顧問之選

聖祖仁皇帝康熙十七年

特詔內外大臣薦舉博學鴻詞召試授職一時名儒碩彥多

預其選得人號為極盛迄今數十年來館閣詞林儲才
雖廣而宏通博雅淹貫古今者未嘗廣為搜羅以示鼓
勵自古文教修明之日必有瑰奇大雅之才况蒙

聖祖仁皇帝六十餘年壽考作人之盛涵濡教澤薄海從風
朕延攬維殷闢門籲俊敦崇實學諭旨屢頒宜有品行
端醇文才優瞻枕經菲史殫見洽聞足稱博學鴻詞之
選所當特修曠典嘉與旁求除現任翰詹官員無庸再
膺薦舉外其他已仕未仕之人在京著滿漢三品以上

各舉所知彙送內閣在外著督撫會同該學政悉心體
訪遴選考驗保題送部轉交內閣務期虛公詳慎搜拔
真才朕將臨軒親試優加錄用廣示興賢之典茂昭稽
古之榮應行事宜著大學士九卿會議具奏

初十日

諭吏部佐雜官員告病回籍者向無復用之例今若准其
補用恐開規避之端倘因假捏等弊而將出結具題之
上司官員悉加處分是因微員作弊而累及多人亦非

情理但微員中或有出衆之材而一時以病呈告便至放廢亦覺可惜其如何酌量定例之處該部妥議具奏

十二日奉

上諭今年朕加恩遠省落第舉子特令大臣等揀選引見將其中人材可用者交與吏部記名請旨年老者以教職補用此乃格外之恩後不為例恐各省年老舉人本不欲會試者見此次恩旨於下次勉強赴試希冀得官空多往返著該部傳旨諭之

十四日奉

上諭向來直隸盜案往往多於他省朕以畿輔重地理宜倍加肅清乃宵小肆行如此不得不嚴加懲創以示儆戒是以預先屢次曉諭然後定例於雍正八年為始將盜夥不分首從皆行正法此朕辟以止辟不得已之苦心也近年以來直隸盜案較前減少是小人頗知畏法朕仍可遵奉

皇考法外施仁之意從寬辦理矣著將直隸盜案仿照各省

分別法無可貸情有可原定擬具奏僮姦民玩法日後盜案復多朕必仍照不分首從皆斬之例行若各省盜案有加多於平日者亦照不分首從之例行著各該督撫地方有司通行曉諭務使遠鄉僻壤之民共知之

十九日奉

上諭凡有罪人犯應行發遣黑龍江者前經辦理軍機大臣等議令改發查克拜答里克等處種地効力贖罪已奉旨允行在案朕思滿洲漢軍人等不諳耕種之事若

發往查克拜答里克甚屬無益目今伊等尚未起身著仍照舊例發往黑龍江等處向後滿洲漢軍應行發遣之人俱照此辦理

二十日奉

上諭翰林官員學習國書原以備繕譯編纂之任必須專心熟習辨析精微積學功深與年俱進始為無忝厥職查從前選館之例庶吉士年四十五歲以下者悉皆分讀清書朕御極以來祇令擇年少資敏者每科不過十

餘人俾其學習蓋冀其年富力強可收記誦繙譯之功也而翰林等甫經散館遂謂無從考驗即東置高閣漫不經心是從前之教習三年轉為虛設矣論語云月無忘其所能夫始之所習繼而忘之已為可惜况國家功令所關儒臣學問所繫豈可因怠惰而棄前修嗣後庶吉士等雖經授職或數年以後或十年之後朕當再加考試驗其能否仍然精熟必從優錄用以示鼓勵其或遺忘謬誤者亦必加以處分可傳諭諸翰林知之

二十一日吏部奉

上諭部屬官員有告假期滿及丁憂起復緣事開復者定例俱於單月俟有本部缺出補用而本部出缺未必適逢單月之期所以候補各員有待至經年累月者朕思告假期滿及緣事開復人員自應遵照定例若丁憂起復人員亦拘定例守候需時於情理未協嗣後除告假開復二項仍照舊例於單月銓補外其丁憂起復人員著不論單雙月遇有本部缺出即行補用將此永著為

例

二十二日奉

上諭凡奏事惟據實敷陳毋用頌揚之語屢經降旨訓飭今閱奏摺仍有瑣瑣用頌揚語者不但披覽之下殊覺煩冗而所奏之事反致不能詳盡是大臣等未將朕訓旨曉示耳著再行傳諭凡奏事惟敷陳正意其稱頌浮辭不必叙入

二十七日奉

上諭八旗各佐領下俱有鐵匠鞍匠弓箭等匠每月給伊等錢糧俾充各項匠役者特欲其平時學習手藝以便行軍之際攜彼行走修理一應器械耳前因各項匠役雖存其實能製造者甚少而該旗大臣官員亦不甚稽查管教是以特交與武備院令其教習今聞伊等尚未學習遇有製造官物俱僱人代做僱覓一匠至費數人錢糧且將每日應得飯錢一併給與所僱之人伊等身充匠役食國家廩餼乃不勤習技藝將所得錢糧不養

瞻家口而僱人代做身為廢物是何道理今伊等在家
猶可僱人僅至軍前寧能僱人乎遇有官物製造立見
其悞矣此甚為惡習公私俱屬無益皆由該管大臣官
員等不以事務經心平時不行查管之所致也將此交
與武備院及該管大臣等嗣後務須不時嚴察管教俾
加緊學習其八旗作何特派官員會同監察監造官督
令學習俾製造不致有悞而僱人代作等弊可以永除
之處著武備院會同都統等詳悉查議具奏至於各省

駐防兵丁內亦有匠役京城匠役尚且如此諒各省匠役豈能親身製造著該將軍大臣等嚴加管教勒限一年令其加緊學習且試驗匠役手藝亦屬甚易朕差人試驗時儻仍有不能製造者必將該將軍大臣等一併治罪

二十八日奉

上諭朕覽本朝人刊寫書籍凡遇胡虜夷狄等字每作空白或改易形聲如以夷為彝以虜為鹵等字樣閱之殊

不可解揣其意蓋妄為本朝之忌諱曰避之以明其敬
慎不知此固背理犯義而不敬之甚者也夫中外地所
畫之境也上下天所定之分也我朝肇基東海之濱統
一諸國君臨天下所承之統堯舜以來中外一家之統
也所用之人大小文武中外一家之人也所行之政禮
樂征伐中外一家之政也內而直隸各省臣民外而蒙
古極邊諸部落以及海濱山陬梯航納貢之倫莫不尊
親奉以為主乃復追遡開創帝業之地目為外夷以為

宜諱於文字之間是徒辨地境之中外而竟忘天分之
上下不且背謬已極哉孟子曰舜東夷之人也文王西
夷之人也舜古之聖帝而孟子以為夷文王周室受命
之祖孟子為周之臣子亦以文王為夷然則夷之字樣
不過方域之名自古聖賢不以為諱也明矣至以虜之
一字加之本朝尤為錯謬漢書注云生得曰虜謂生得
其人以索貫而拘之也敵國分隔互相訛詆北人以南
為島夷南人以北為索虜漢唐宋元明邊烽不息每於

不能臣服之國反以為虜我滿洲住東海之濱並非胡人亦從未被虜若言東夷之人則可今普天之下率土皆臣雖窮邊遠徼我朝猶不忍以虜視之惟準噶爾背天逆命自棄於王化之外或可呼之為胡虜耳至若王師入關漢人順命心悅誠服而為臣子在本朝尚不忍以漢人為虜而漢人轉以此為本朝諱豈獨昧於大義并字義亦失之矣總之帝王之承天御宇中外一家也上下一體也君父臣子之分定於天也尊親忠孝之情

根於性也未聞臣子之於君父合體同心猶可以絲毫
形迹相歧視者也我朝正位建極百年於茲矣

列祖相承功德隆盛迨

世祖章皇帝入撫中夏救斯民於水火而登之衽席仁心仁

政洋溢中國

聖祖仁皇帝臨御六十餘年深仁厚澤淪肌浹髓中國之聖
主自堯舜以來莫可比倫朕以涼德纘承緒統勤求治
理勉效

祖考雖未能跂及萬一然十載之秉公矢誠朗如天日滿漢
蒙古並無歧視此心久為臣民所共曉矣夫滿漢名色
猶直省之各有籍貫也文移字迹未便混同初非留此
以為中外之分別乃昧於君臣之義者不體

列聖撫育中外廓然大公之盛心猶泥滿漢之形迹於文藝
紀載間刪改夷虜諸字以避忌諱將以此為臣子之尊
敬君父乎不知即此一念已犯侮慢大不敬之罪而不
可逭矣此皆始作之大姦大逆譏訕之辭後人由之而

不覺淺夫寡識至於如此嗣後臨文作字及刊刻書籍如仍蹈前轍將此等字樣空白及更換者照大不敬律治罪各省督撫學政有司欽遵張揭告示窮鄉僻壤咸使聞知其從前書籍若一概責令填補更換誠恐卷帙繁多或有遺漏而不肖官吏遂借不遵功令之名致滋擾累著一併曉諭有情願填補更換者聽其自為之

二十九日奉

上諭前歲派家選兵出征時朕特加恩令凱旋時將伊等

妻子由各家主名下開為另戶今各路出征兵丁內有
開檔之領催馬甲伊等久歷行間勤勞効力殊屬可憫
著交與各路軍營將軍大臣等似此等開檔領催馬甲
內有効力優者將姓名註冊登記俟大兵凱旋將伊等
亦照家選兵例開為另戶

世宗憲皇帝上諭內閣卷一百三十

欽定四庫全書

世宗憲皇帝上諭內閣卷一百三十一

雍正十一年五月

上諭十四道

初一日奉

上諭部院衙門銷算錢糧事件俱用書辦計算司官筆帖
式內通曉算法者少即姦吏作弊亦不能查算法乃六
藝之一各部院筆帖式辦事之暇有情願學習者令其

學習俟三年後候朕考試再官學生候補筆帖式俱令其學習有情願考試者亦准其考試優者朕加恩另用

初二日

諭內閣教習庶吉士所以造就人材使之沉潛經籍涵泳藝林可以典制誥之文鳴國家之盛也從前庶吉士皆就翰林院讀書教習大臣不時策勵是以身心約束學殖易增館閣之間蔚然稱盛朕意今科選拔庶常仍令在翰林院衙門讀書俾教習諸臣得以朝夕訓課兼厚

給廩餼資其膏火庶幾枕經菲史文藻可觀克稱詞臣
珥筆之職其應查照前例及如何加與廩給之處著酌
議具奏

初七日奉

上諭近聞山東通省雨澤俱已霑足但從前有得雨稍遲
之州縣今年二麥歉收民力未免拮据况得雨之後無
力耕種錢糧輸納承辦維艱朕心軫念著該督撫將得
雨稍遲之州縣衛所應徵新舊錢糧緩至秋成之後再

行開徵以示朕體恤閭閻之至意

初九日奉

上諭朕於直省地方偶遇災祲即為之寢食不寧蠲租發粟截漕平糶多方撫恤務使貧民無一不得其所又念各該地方雖或收成歉薄豈無蓋藏豐裕之家伊等誼篤桑梓休戚相關若各人量力樂輸既可以展其睦婣任恤之情亦可以為恤災扶困之助是以曾經降旨通行勸導然亦聽紳衿士庶自為之不相強也近聞直省

地方捐貲周急好善樂施者頗不乏人此誠鄉鄰風俗之美亦人心古處之一驗也此等良善之人應加恩澤以示褒嘉著該督撫留心體察秉公確訪其捐助多者著具題奏請議叙少者亦著地方大吏給與匾額並登記檔冊免其差徭以昭朕與人同善之至意

初十日奉

上諭上年江蘇被水之州縣朕已降旨多方賑濟今春又復添賑四十日以加惠貧民茲當徵收錢糧之時其被

金史卷一百三十一
災稍重之處小民輸課未免艱難著該督撫秉公確查
將應行緩徵之州縣奏聞緩徵待至秋成再令完納以
紓民力以廣國恩

又奉

上諭向來各省布政司衙門給發兵餉不肖之布政使多
扣剋平頭是以各營分給兵丁另用輕平給發近日各
布政使頗知奉公守法不敢扣剋平頭而營中分給兵
丁仍用舊日輕平以致各兵不能均霑實惠聞楚省現

在如此則他省可知著各省督撫會同提鎮布政使將
司平與營平較對畫一並將營平鐫刻字號該管大員
仍不時稽查無令劣弁得以上下其手

又奉

上諭各省州縣設立社倉原以便民濟用若遇應行借給
之時該州縣一面申詳上司一面即速舉行方可以濟
閭閻之緩急儻其中有假捏虛冒等弊自難逃督撫之
耳目聞直隸百姓借領社穀必待督臣咨請部示而後

准行往返動經數月小民守候維艱仍不免重利告貸之苦著該督李衛酌量定例變通辦理咨報存案嗣後遵照施行

十一日刑部以江西新城縣民黃二致死伊兄黃魯山一案請

旨奉

上諭黃魯山酗酒廢產頑梗不孝又欲盜賣伊母余氏膳田曾經余氏具稟有案是黃魯山忤逆之罪無可逃矣

黃二迫於母命將魯山致死情有可原著從寬免其治罪不必發遣其協助下手之何友爵涂介文亦著從寬免其流杖此案乃朕原情辦理者將來不肖之徒或知有從寬之例假造捏飾以圖卸罪亦未可定此次寬免之處後不為例並著通行曉諭知之

二十日兵部將年老之郎中阿爾哈圖等帶領引

見請

旨奉

上諭阿爾哈圖瑪紳年力衰邁此等人員留在部內不但於部務無益且礙後進之階爾部應早為奏聞何遲至於今仍以該員等或改用旗員或令休致兩請具奏阿爾哈圖瑪紳著原品休致並傳諭各部院衙門堂官如章京筆帖式內有此等年老衰邁人平常者即行奏聞僅瞻徇姑息經朕察出必將該堂官嚴加議處

二十四日奉

上諭北路所派四省綠旗官兵有在軍前病故者其本營

未奉部文之前家口所領月餉朕已於上年八月降旨免其追還今思西路亦有調撥別省綠旗兵丁其中豈無在軍前病故者若將本營未奉部文之先伊等家口所領月餉按日著追實為可憫著行文各該省若有軍前病故兵丁俱以文到之日扣除月餉其未奉部文之前已經支領者免其追還倘有豫借庫銀之處著以該省司庫存公銀兩代為補項

二十五日奉

上諭從前曾令出征兵丁家中有寄帶衣服等物者俱著送部於運送官物之便帶至軍營朕思衣服等物隨時需用必俟運送官物之便始行寄往未免稽遲時日且堆積繁重帶送亦覺艱難著該部將兵丁家中帶去之物酌量各旗送到之數間一二日作一起由驛站遞送

二十七日奉

上諭自西路用兵以來甘肅等處百姓効力為多其踴躍急公之念更屬可嘉是以屢年地丁錢糧朕皆降旨蠲

免上年並將米穀豆草等項悉令免徵以示朕加惠問
閭逾格施恩之至意近聞春夏之交秦省雨澤應時二
麥豐稔此即秦民忠義淳良荷

天福祐之明驗朕心欣慰著將甘肅所屬本年應徵地丁銀
二十七萬九千三百餘兩仍行蠲免以足民用以廣國
恩該督撫務飭有司敬謹奉行俾百姓均霑實惠

二十八日刑部以西安民人王修恥毆死楊考顯一

案請

上旨奉

上諭王修恥與白根僧共毆楊考顯至死署西安巡撫史貽直既以王修恥下手傷重抵罪又以獨子奏請留養是此案無抵償之人矣夫獨子留養乃國家法外之仁而允惡之徒往往恃有恩宥之例好勇鬪狠或夥衆共毆而獨認其罪以冀倖免又或遇無識之有司務為姑息而遷就以定案此風皆不可長王修恥不准寬免依擬應絞著監候秋後處決

二十九日奉

上諭紀成斌本由行伍出身蒙

聖祖仁皇帝深恩屢加拔擢至參將之職雍正元年朕因年羹堯保薦遂用為副將旋即補授總兵官特陞提督實為逾格之恩嗣因西陲用兵關係重大協贊務得其人岳鍾琪薦伊素嫻軍旅可以任用朕亦料其重受國恩自必努力戎行力圖報効是以委以協贊軍務之重寄雍正八年岳鍾琪進京陞見將大將軍印務令伊護理

伊當此大任自應愈加敬謹悉心籌畫於緊要卡倫嚴
密偵探於賊人窺伺思患預防庶可上報國恩下稱職
守詎紀成斌昏庸懦怯玩愒性成將軍國大事視同膜
外全不經心以致賊人覘其疎忽乘隙侵擾卡倫損傷
將弁殘害士卒被掠馬駝羊隻無算鎗礮器械口糧遺
失亦多維時紀成斌身在大營掌握重兵恐懼驚惶一
籌莫展聽賊衆環營往來如入無人之境西路軍威因
此大損且致逆賊資我之馬駝器械得於次年侵犯北

路是兩路軍營之被賊擾掠者皆紀成斌貽之害也至
今出征將弁兵丁莫不痛恨切齒天下之人亦莫不以
紀成斌喪師辱國縱賊失機之罪為法所難宥彼時在
廷大臣即奏請將紀成斌按以軍法明正典刑以肅軍
紀朕猶予以自新之路特降諭旨暫緩治罪俟事竣之
後再定實望其感激抒誠黽勉効力以稍贖前愆也乃
伊獲罪後在營一載仍無愧悔之心亦無出力之處朕
始降諭旨將伊革去提督降為副將凡有差遣令其効

力行走若仍不知愧悔必究前案以重處之所降諭旨甚為明晰若伊稍有人心自應感恩畏法洗滌肺腸以圖後効乃伊冥頑不靈目無國憲既不思從前獲罪之重大亦不念曲加寬宥之深恩於雍正十年正月賊犯哈密之時同曹勳領兵堵截遇賊於二堡之西仍復退縮不前致賊兔脫尚敢扶同曹勳捏報力戰四時朦混掩飾今於駐防搜吉卡倫又敢故違將令漠視軍務以致車輛被刦是紀成斌所至之地在在疎防無不失機

養寇者可見伊全無改悔之心而且有意誤公債事核
其前後罪案情無可寬法無可貸著署大將軍等將紀
成斌即於軍營處斬以為將弁失機縱賊負恩誤國者

戒

世宗憲皇帝上諭內閣卷一百三十一

欽定四庫全書

世宗憲皇帝上諭內閣卷一百三十二

雍正十一年六月

上諭九道

初七日奉

上諭上科進士分部學習者今已滿三年之期著該部堂官秉公分別其應用部屬者著以六部主事歸班選用其應用知縣者即照進士甲第名次歸班選用該部詳

全史卷一百三十二
卷一百三十二
悉定議具奏

初八日奉

上諭武弁中熟習水師之人甚為難得該管大臣若不於平日留心儲養何以收人地相宜之效每見督撫諸臣中有將熟習水師人員題請調用陸路者此皆未曾周詳籌算之故著通行傳諭嗣後細加體察若在水師中為平常之員而長於陸路者准其調補陸路若係長於水師之員俱留於水師員缺題補不可因陸路一時需

人輕易改調以致用違其長從前有如此悞用者可查明題請改調向後部中推陞之缺亦著該部聲明請旨
初十日奉

上諭據河南署撫孫國爾奏報豫省歷年耗羨銀兩除本地公事支用外現存司庫銀七十萬兩有零又社倉存貯穀麥等項共計二十八萬石有零等語此皆原任總督田文鏡在任多年殫心經理之所儲蓄者從前提解耗羨本是澄清吏治休養生之意屢經降旨此項出

自民間若本地公用充裕朕仍當加恩本地官民使之
霑被惠澤不令歸入公帑也今豫省存貯耗羨既有七
十萬兩之多而該省官員等每年所得養廉又已敷用
無須再為增添正當加惠閭閻俾令邀恩於格外著將
河南本年地丁錢糧蠲免四十萬兩即以存貯之耗羨
照數撥補還項該督王士俊可督率有司敬謹奉行使
豫民均霑實惠大凡耗羨多餘之省該督撫藩司等往
往不甚愛惜隨數用去並不為百姓計而存摶節之心

即如晉省巡撫養廉每年至三萬兩而藩司至一萬五千兩皆相沿以為固然若伊等留意民生諸凡早為節省則儲蓄充盈亦可為加惠編氓之助矣

十四日奉

上諭各省挑選之勇健兵丁朕原冀其黽勉出力各圖上進之路以膺國家厚澤無奈其中賢愚不等優劣不齊是以不得不甄別挑汰以示勸懲今挑出赴營各兵既循分守法有奮勇効力之心著給與馬步戰糧俾得內

外充裕其自甘起程之時每人借支銀十二兩共一萬四千七百兩并上年十月借過製辦鞦韆等項未扣銀二千五百三兩零俱著賞給免其在月餉內坐扣以示朕格外加恩之至意著總兵周一德等曉諭各兵知悉其挑汰之三百二十九名或係庸劣無能或係強橫不法者前已降旨令遞回原籍交地方官嚴行收管約束不許出境生事即民壯快役亦不可令其充當若有心懷怨望捏造浮言並恃強肆橫鬪毆不法等事該地方

官立即拘拿稟知督撫提鎮一面奏聞一面將該犯即行正法從前所降諭旨甚明著該部再行通飭令該地方官出示遍行曉諭

十七日奉

上諭從前雲貴廣西等處不法土司除首惡懲治外其餘人等則令安插內地給以房屋地畝俾得存養不致失所聞該省督撫等不即留心經理遲至一二年後始撥給房地以為養贍而地畝又相隔遙遠土司不能親自

耕作惟賴該縣知縣代徵糧穀易銀轉交每年非被佃戶侵收即胥吏中飽有名無實以致各土司饑餓困頓竟有私自逃匿者重負朕體恤生全之至意著通行曉諭有安插土司之地方令該督撫悉心稽查若有從前辦理不善之處即行更改並飭有司等不時體察務令安全以受國家豢養之澤儻仍疎忽從事必嚴加議處

十八日平郡王福彭奏繼祖母瓜爾佳氏歸母家守節三十餘年請迎歸奉養奉

上諭平郡王繼祖母守志三十餘年甚屬可嘉准照王所請迎歸奉養仍加恩旌表著宗人府會同禮部定議

二十一日奉

上諭國家祀典最宜慎重至於

文廟春秋祭儀尤宜備物盡誠以申敬禮聞外省州縣中有因除荒而裁減祭祀公費者朕思銀數若少難於措辦或致祭品簡略或致派累民間二者均未可定著各省督撫查明所屬若有除荒減費之州縣即於存公銀

內撥補以足原額務令案盛豐潔以展朕肅將禋祀之誠

又奉

上諭由京師至江南道路往來行旅繁多朕於雍正七年特遣大臣官員前往督率地方官修理平治不惜帑金成功迅速又令道旁種樹以為行人憇息之所比時田文鏡董率河南官員種植培養林木茂密較勝他省經過之人皆共見之凡此道路樹木皆朕降旨交與該地

方官隨時留心保護者近聞官吏怠忽日漸廢弛低窪之處每多積水橋梁亦漸折陷車輛難行道旁所種柳樹殘缺未補且有附近兵民斫伐為薪者此皆有司漫不經心而大吏又不稽查訓戒之故甚屬不合著傳諭該督撫等轉飭有司照舊修理務令平坦整齊或遇雨水泥潦隨損隨修不得遲緩其應行補種柳樹之處按時補種並令文武官弁禁約兵民不得任意戕伐儻有不遵將官弁題參議處兵民從重治罪

二十三日刑部以江南丹徒縣民謝天祥毆死王茂
生一案請

旨奉

上諭謝天祥從寬免死照例發落准留養親夫獨子准其
留養乃國家法外之仁而兇惡之徒往往恃有恩例肆
意妄行或衆人共毆而推卸於此一人或一人獨承以
脫衆人之罪而無識之有司又或以姑息為寬大假借
遷就以定讞獄種種弊端難以悉數是以每年奏請留

養之案甚多凡殺人者抵償乃天理人情之正或其中情有可原而曲從寬典此又體古帝罪疑惟輕之意而隨事酌量者若不論情罪之輕重而但以獨子槩令從寬已非情理之當况其間未必盡係獨子乎有罪之人僥倖漏網恐成長姦之漸但定例已久朕不便遽行改易且不教而殺有所不忍著通行曉諭內外軍民人等已身既為獨子更當思念父母無依謹身奉法以遠刑辟若好勇鬪狠怙惡不悛數年之後獨子傷人之案仍

復不減朕惟有執法定罪以懲究頑不能曲為寬假也
著該管大臣官員通行宣布遠鄉僻壤之人咸使聞知

世宗憲皇帝上諭內閣卷一百三十二

欽定四庫全書

世宗憲皇帝上諭內閣卷一百三十三

雍正十一年七月

上諭十道

初一日辦理軍機大臣奉

上諭據侍衛達哈蘇等奏稱科爾沁公喇嘛扎卜旗分並
無牲畜其貧苦人等惟有六月至八月賞給所食米糧
養贍今年穀粒三分內祇種有一分又經亢旱發生甚

屬平常等語朕思此所種之穀即使全收亦不足養贍
合旗數千人口若所收平常則貧人必至於饑饉流散
不可不預為籌畫可酌量伊等與何處相近即動支彼
處米穀賑濟及如何養贍俾其過冬之處爾等詳查議
奏

初六日大學士陳元龍以年老乞休奉

上諭大學士陳元龍老成練達學問優長奉職多年宣勞
中外朕念其為

聖祖仁皇帝簡用舊臣晉秩綸扉俾承恩眷今以年逾八旬
具疏乞休情詞懇切朕勉從所請著加太子太傅銜以
原官致仕令伊子翰林院編修陳邦直隨歸侍養其南
旋時著沿途官弁迎送盡禮

初七日奉

上諭據署湖廣提督張正興奏報四月初六日常德府城
北門內民居失火延燒兵民瓦草房屋二百八十戶共
一千四十八間幸未延及倉庫致傷民人等語朕屢降

諭旨令各地方有司預備救火之具倘遇有不虞即竭力搶救此非不可以人力撲滅者今常德民居偶爾失火遂至延燒房屋千餘間之多是該地方救火之器具平日並未留心而搶救又不用力可知矣常德如此則他省地方可以類推著傳旨通行曉諭嗣後倘仍復疎忽因一、二家失火而延燒多戶者定將該地方官從重議處該督撫一併察議

又奉

上諭聞上年秋月江南沿海地方海潮泛溢蘇松常州近
水居民遭值水患其本地方紳衿士庶中有僱覓船隻
救濟者有捐輸銀米煮賑者今年夏間時有疫癘紳衿
人等又復捐施方藥資助米糧似此拯災扶困之心不
愧古人任卹之誼風俗淳厚甚屬可嘉著該督撫宣旨
褒獎仍遵前諭將捐助多者具題議叙少者給與匾額
登記檔冊免其差徭並造冊報部

初十日奉

上諭據副總河西柱奏稱江南通州所屬范堤殘缺之處業已修築完竣所有庫發工價銀兩各場竈總感戴國恩情願急公効力俱已繳還運庫等語朕允從江南督臣等之情發帑修理范堤原係保護鹽場加恩竈戶之意其工費銀兩何用竈總捐輸著西柱出示曉諭照數給還勿使不肖官吏人等侵蝕中飽

又戶部議覆協理直隸總督顧琮請給囚糧奉

上諭依議凡繫獄囚犯俱給口糧久有定例祇因各省舊

日額設之項有無多寡不同遂致奉行不一即間有州縣官自行捐助者亦不可以為常著通行各省督撫藩臬悉心詳查若該府縣額設之項歲有餘糧則當分給於不足之府縣若本地原無額設之項或額數不符則應公同酌量動支存公銀兩核實散給令各處監禁之犯日食有資不至饑餒儻有刑書禁卒尅扣等弊一經發覺將該管官員一併議處

十一日奉

上諭前因傳爾丹輕進和同胡爾哈地方以致失利回至科布多後賊兵旋復來犯順承王錫保在察漢叟爾調撥兵丁預備防範俱屬妥協是以朕格外加恩晉封親王授為大將軍及至去年賊兵來犯而錫保不能預為防備且奏稱撥兵一萬令赴烏遜珠爾地方乃所到之兵僅有三千又將領兵之將軍傳爾丹留於大營俟賊兵至後始令前往因所調之兵不能全到以致邀截無濟俾其直越至克爾森齊老地方始遇額駙策凌將軍

塔爾岱等領兵一萬拒賊人三萬之衆奮勇截戰一面
星速差人呈報令其速發援兵克爾森齊老距烏禮雅
蘇台大營僅七十餘里而錫保不即發兵前往必俟丹
津多爾濟到後始遣赴救援又不速令起身支吾遲緩
兼以丹津多爾濟行未十里即劄營住歇彼時若速發
兵丁應援竟可殲滅以成大功是時額駙策凌等與賊
拒戰二日知援兵不至始收兵回歸大營錫保亦不責
丹津多爾濟救援遲悞之罪反令丹津多爾濟統兵追

擊且錫保自為大將軍以來凡事並不據實辦理每聞賊至輒驚惶無措將馬匹攢集一處兵丁時撤時撥以致二年之內馬匹傷損數萬闔營無不怨恨譏誚者錫保身膺大將軍之任賊來不能邀擊及其深入之後又令兔脫此皆調遣失宜怯懦畏葸之所致也似此機會誠為可惜實負朕簡用之恩錫保之有玷職任離失衆心損傷馬匹畏葸失機之咎難以枚舉理宜從重治罪姑念其前歲於科布多事後尚能籌畫整備著暫革去

大將軍親王其順承郡王著查應襲之人令其承襲熙
良世子之爵亦著革去現命多羅平郡王為定邊大將
軍前往俟到軍營時著錫保聽平郡王指示効力贖罪
若悛改前非實心効力則已如仍前不肯實心効力行
走經平郡王叅奏時定從重治罪丹津多爾濟乃喀爾
喀一微末台吉耳蒙

聖祖仁皇帝恩施教育令其承襲伊父扎薩克貝勒之職朕
御極之初即格外加恩封為郡王嗣因採買軍需馬駝

竭蹶効力又晉封親王屢加厚恩迥異他人且畀以辨
理軍需馬駝要任乃去年額爾得尼昭地方大敗賊人
一事伊竟冒為己功捏飾奏報朕謂其著有勞績賞以
黥爾根巴圖魯之號並封伊子多爾濟色布登為世子
今聞丹津多爾濟並不為國實心報効惟己身是謀瞻
顧猶豫順承王令伊領兵前往克爾森齊老救援之時
伊乃故意遲延行至十里即安營住歇額駙策凌路遇
丹津多爾濟云爾先領兵速往衣老地方擊殺賊寇我

等隨卽領兵往助乃丹津多爾濟並不聽從旋撤兵回營後順承王又令伊統兵追擊伊復不敢前往一味退避至鄂爾昆附近奎蘇地方安營是夜伊同車布登潛出軍營於十五里之外一山溝內住歇及額爾得尼昭接戰之時額駙策凌率領右翼官兵奮勇衝擊已將賊兵殲殺殆盡而丹津多爾濟帶領左翼官兵觀望不前至晚額駙策凌擊退賊兵次日衆人皆欲急行追擊惟丹津多爾濟支吾遲延直至日中始行起營略行數里

即使住歇以致賊人乘隙遠遁彼時若奮力追擊則殘
敗賊人儘可殲滅似此錯失機會皆伊之罪也且一應
功績俱冒為己有捏造言詞急行奏報及朕降旨詢問
其救援遲緩領兵觀望之處究不能掩飾至於賊寇由
杭靄山之後逃遁伊並不尋踪追擊轉由杭靄山之南
遶道而行追賊時又不早行延至日中起營而以繕摺
遲延為詞夫繕摺原非急務豈可因繕摺之故遲悞大
事此特粉飾之言耳且數年以來所辦馬駝甚屬不堪

皆致貽悞理應將丹津多爾濟從重治罪但念伊從前採買馬匹曾經効力暫行寬免著削去巴圖魯之號並伊子之世子亦著革退所賞黃帶子一並撤回革去親王授為郡王仍留喀爾喀副將軍之任令其辦理未完馬匹之事協助大將軍平郡王料理蒙古事務効力贖罪倘不實心効力仍蹈前轍希圖推諉倥倖軍需馬匹稍有貽悞定將從前過犯一併追擬從重治罪車布登原係扎薩克公先因追擒脫逃之烏梁海羅卜藏西拉

布等著有勞績格外加恩晉封貝勒適因捏奏伊前年在蘇克阿爾達呼地方擊敗賊衆又在額爾得尼昭奮勇衝擊朕謂其建立勲勞是以賞給巴圖魯之號併賜與黃帶子晉封郡王今實情畢露方知車布登並未實心効力伊帶兵一千遇百餘賊寇即怯懼不前故張聲勢俾賊遠遁又同塔爾岱領兵追賊伊誑言由捷徑邀擊將兵丁引至山谷難行之地以致賊寇漏網車布登係喀爾喀生長之人如何不諳路徑至於迷踪此皆怯

於臨陣使賊遠遁希圖草率完事之故耳並無為國効力之實心著革去郡王仍授為貝勒撤回黃帶子其巴圖魯之號亦著革去令往科布多軍前効力贖罪伊若自知罪愆黽効力則已倘仍不効力退縮瞻顧定從重治罪

二十日奉

上諭前據署直隸總督事務顧琮奏報六月內各屬地方連得透雨其中有偏多過驟之處以致河流泛溢田禾

被淹人口間有傷損廬舍亦有傾圮者已分路委員查勘經理撫恤等語朕比即降旨令該督等轉飭地方官及差往人員加意撫綏毋使窮民失所今據直隸總河王朝恩奏稱今年伏汛之水長發甚大山東地處上游其德州吉山店老虎倉等處決口漫溢之水俱歸直隸地方是以濱河低窪之地遭值水患等語自上冬以及今春直隸山東地方雨雪稀少朕心憂慮為民虔誠祈禱幸蒙

上天垂鑒疊沛甘霖遠近霑足目前秋禾秀實大有豐稔之象朕心不勝感慶茲聞近水低窪之地因伏雨稍多河流漲發禾稼被淹人口亦有傷損者朕心深為憫惻著直隸總督山東督撫遴選賢員速行查勘或動倉穀或動帑銀確實賑濟務令被水窮民均霑實惠毋使地棍侵漁胥吏中飽倘奉行不善以致恩不下逮經朕訪聞定將該省大小官員從重議處

又奉

上諭上冬今春之間北地雨雪稀少朕即恐夏月有蝗蝻之患曾切降諭旨通行直隸山東江南等省督撫大吏飭令所屬官弁先事預防不得苟且塞責續於五月間聞江南淮揚所屬之山陽寶應等處有蝻子萌動之機朕又特降諭旨責令上緊捕治毋得稽緩嗣據魏廷珍奏報撲滅殆盡朕又復嚴切批諭之昨高其倬奏稱山東江南接壤之州縣蝗蝻尚未淨盡而州縣有司以地界兩省未免互相推諉朕又批諭高其倬曰若有司怠

玩蝗患不除咎歸於汝朕之為民先事防維者亦殫竭心力矣今據王士俊奏稱從前曹縣魚臺兩縣蝻子生發臣已動支存公銀五百兩多僱人夫撲滅淨盡近日濟寧官弁報稱該地方有蝻子生發之機亦已撲滅無遺惟是隣近之江南豐沛碭山等縣尚有未盡倘或飛越入境即隨到隨除等語朕覽各督撫先後所奏是蝗蝻萌動之處山東江南二省州縣皆有之祇因彼此壤地相接不肖官吏遂謂可以卸過於隣封而巧為推

諉捕治不力情事顯然著傳旨速行曉諭餘孽未淨將來災及田禾將兩省地方官均加嚴處其督撫等一併從重察議不稍寬貸


二十一日奉

上諭據四川總督黃廷桂巡撫憲德奏報潼川州鹽亭縣鄉民楊士榮家於本年五月初八日有牛產生瑞麟謹繪圖進呈恭疏稱賀等語朕從來不言祥瑞屢降諭旨甚明上年山東巡撫奏產瑞麟朕又將朝乾夕惕之心

宣諭中外不准臣工奏賀今川省鄉村瑞麟再見朕心
倍加愧悚惟在吾君臣共修實政士庶共敦實行庶幾

感召

天和潛消災沴年穀順成萬民樂業此朕心所謂祥瑞也



世宗憲皇帝上諭內閣卷一百三十三